



حقوق الطبع محفوظة ©

اسم الكتاب: ما بين الشك والمعنى

تأليف: أحمد جابر

القطع: 21X14

تدقيق لغوي: تامر علي

سنة النشر: 2025

تصميم داخلي: الباشا عبد الباسط

الناشر: دار الزيات للنشر والتوزيع

تم الإيداع بدار الكتب والوثائق المصرية برقم: 28208 / 2024

الترقيم الدولي (ISBN): 3 - 563 - 844 - 977 - 978



دار الزيات للنشر والتوزيع

المشهرة قانوناً بسجل تجاري رقم/ 49351

ت: 01066736765 - 01015766014 / shahnda71@gmail.com



9 789778 445633

ما بين الشك والمعنى

« شعر بالعامية المصرية »

أحمد جابر



إهداء

لأجل السكك نَبَتَ الخُطى الجافة
وأمي الي وقفت جانبي ع الحافة
والدي الي آمن بيا بعد الفتح
أهلي الي كانوا في المجاعة القمح
ورفاقة رغم القلة مُلتفّة

أحمد جابر

الشك

الشك داء ولا تجلّي؟
حل السؤال يلزم حلّي
في سائل الكون الأزلي
علشان بيان لي الزيف م الأصل
واوصل لمهد القول الفصل
يغزل لي من شُوفه هداية
قنديل، إذا اشتد عمايا
يفصلني بالنور عن ضلّي
الشك داء ولا تجلّي
الشك طير ماهوش رجلين؟
ولا الإيمان سجان بنايين؟
ماشية الحياة وسאיعة الضدين
وانا بين بينين خايف أميّل
كان إيه جرى لقلب العيل
علشان يتوه وسط الدائرة؟

يا خلق بين شطين حائرة..
بتلوم على مراكب سايرة..
المعركة من بدء الخلق..
وفُ كل جبهة شهادة وحق..
وأنبيا ما يطولها عدد..
دراويش ومدد..
المعركة بالقول والشوم..
بين الي جايز والمحتوم..
والوقت فوق الكل قَدُوم..
ينزل يسد الدين في الحين..
يطبق على مَسُود أو سايد..
ومافیش عن الدائرة زَواید..
ولا خانة تنفع لِحايد..
أي اختيار يبقى الأتقل؟
يا تراهنواع الصف المنبوذ..
يا تضموا ع الصف الأول..

فَرَدَ الزَّمنَ سَقْفُهُ وَقَالَ لِي:
مَهْمَا هَتَقَدَّمْ تَوْصِلْ لِي؟
دَلِقْ الزَّمنَ حَبْرُهُ وَقَفَّيْ:
الشَّكْ وَالْإِذْعَانُ رَفَّةً..
وَالْعَقْلُ مُحْتَارٌ فِي الدَّفَّةً..
وَالْوَقْتُ لَوْ يَنْصَفُ، كَفَّيْ..
لَكِنَّهُ مُوزُونٌ عِ الْكَفَّةً..
بِالضِّلِّ مُحْفُورٌ عِ الْقُورَةِ..
ضَدِّينَ يَلْقُؤَانِ فِ بِلُورَةٍ..
طِيفٌ فِي الْمَرَايَا الْمَكْسُورَةِ..
هَتَعِيشُ وَهَتَمُوتُ مَا يَبَانُ لَكَ..
الْأَصْلُ فِيهِمْ مِ الصُّورَةِ..

1994

شاعر يا أهل الله..
حداد في سوق الخشب..
لَفَّتْ سِنِينُهُ السَّكْكَ..
تَجْمَعُ خِيوطُ الْعَجَبِ..
تَغْزِلُ فِي تَوْبِ مَعْنَاه..
كَتَّفَ إِيْدِيهِ الْوَجْع..
تَبَّتْ حِبَالُهُ اتَّوَجَّع..
سَوَّلَ لِعَيْنِهِ الْبُكَاء..
وَأَمَّا اغْتَوَى مَا بُكَيْش..
دُمِعَ الْوَجْعُ مَمْنُوع..
قَرَّبَ وَشُوفَ يَا جَدْع..
حَبَلَ الْوَجْعُ مَوْجُوع..
..

"1994"

هَلَّيْتُ وَلِيهِ هَلَّيْتُ..
عَمْدًا فَيَوْمَ السَّبْتِ..
..

خَطَّيْتُ وما اتَّخَطَّيْتُ ..
في الدنيا إلا الوقت ..
كل الحواجز أُبِت ..
تَعَقَّد معاك الصُّلح ..
حِلْفُكَ ضعيف والأَسَى ..
ناحت في روحك نحت ..
شَبَّيْتُ تطول السما ..
زَقَّتْ إيديك، قَبَّحْتُ ..
سَبَّيْتُ لداء العَجَز ..
وَأَمَّا اعتراك سَبَّحْتُ ..
وكفرت باسم العمَى ..
وَأَمَّا اتعميت فَتَحْتُ ..
زهر الحياة انتشى ..
لَمَّا اغتويت بالخط ..
وَرَضِيْتُ بِحُكْمِ الْوَدَع ..
وَلُعِبْتُ آخر كارت ..

جَمَعْتُ ما قَدَفات ..
وراهنت ع الجايين ..
وضحكت لَمَّا خَسِرْتُ ..
دُنْيَاكَ يَا يُونُسَ بَغْتُ ..
واستخدمت خوفكَ ..
حكم الودع طمنكَ ..
ورماك في بطن الحوت ..
لَمَّا التقيت الموت ..
كَمَلْتُ .. ليه كَمَلْتُ ؟

حَبِيتُ ؟ يَجُوزُ حَبِيتُ ..
وان كان ؟ هتعمل إيه ؟
قلبك مَلُوش مطرح ..
مِنْ زحمة الأدوار ..
صَدَّقْتُ دور الولي ..
ووقفت ع المسرح ..
تتأمل المأساة ..

بتنادي: يا أهل الله..
"كُلّ الي فات كان هنا..
كل الي جايّ لوداع..
الوحدة طيف الونس..
وما فيش في قُرب متاع..
الورد ليه ابتأس؟
- طبع الربيع خدّاع..
لَمَّا الربيع انتكس..
هَلّ الخريف ع الشجر..
يسقي الورق أوجاع".

سمعوك؟ أكيد سمعوك..
صدُّوك؟ هتكر ليه؟
عرضك سخيف انتهى من غير ولا سو كسيه..
كل البشر صقفوا.. لَمَّا انطفئ نورك..
كدّبت ليه طبعهم؟
صدّقت ليه دورك؟

كم سكة

مشيت في العمر كم سكة؟
وكم سكة.. تجيب سكة؟
وكم وحلة.. تجيب وحلة؟
وكم من خضر في الرحلة..
بنالك يأس فوق اليأس؟
وقال عودك ماهوش حمال..
وصدقته وماكملتش؟
وكم كملت؟
وكم من عيسى بيداوي
إذا ما وقعت؟
وكم موسى؟ وكم فرعون؟
وكم مرة بقيت في العون؟
وكم حبوك؟
وكم حييت؟
وكم نجمة بيضوا لك..
إذا ضللت؟

خسرت الناس ..

في كم فُورة؟

وإمتى كُسبت؟

وكم مرّة غَوَاك الخوف ..

فَمَلْعَيْش ..

وبرضه خُسرت؟

وكم صورة ..

نسيت تلْقُطها للذكرى؟

وكم في الرحلة من حكايات؟

وكم عِبرة؟

ما فيش ولا سَكَّة مَ مشيتهاش ..

ما فيش ولا سَكَّة بختارها ..

وبمشي الكل للآخر ..

ولا عمري لقيت آخر ..

ومش عارف بكَمِّل ليه؟

وماتعبشي ..

يجوز مؤمن بشيء هيكون..

يجوز كافر.. بنفس الشيء..

يجوز ولا شيء يكون بينهم..

إذا ما احتجت يوم عيسى..

ما ينجدينش..

وإذ موسى صبح درویش..

وآل فرعون بيتكاتروا..

وإذ بالناس ما حبتنیش..

وإذ بيَّا بحب بجد..

وإذ بالشُّوك..

بيتلُون..

وبایت جَوَّا حُضن الورد..

خسرت كثير، ومالعبتش..

زهدت الكل، ماخسرتش..

ماليش في الذكريات، لكن..

ساعات بتكون..

شهود إثبات..

على العائشين..

وع الأموات..

وكل الطيبين حكايات..

وكل الطيبين عبرة..

يجوز كم سَكَّة كانوا طُوال..

يجوز العُمر لم يكفي..

يجوز الخُضر لم يكذب..

في وقت ما شافني يومها وقال..

"مريض، مكسور، جريح الروح..

ضعيف، لن تستطع صبرا".

الشِّدَّة

شايف قراية مقشرة لكن بترجع..

"هتشوف حكاية منورة؛ لكن، هتجزع؟" ..

خَتِّمْت جرحك ع التمن، قبل امَّا تدفع؟

الكون رواية مُسلية؛ لكن بتخدع..

شر القصيد اللي انحني، والصدق مجدع..

نبّه ألم، سن القلم، سهوًا في ليل الدندنة..

ما يمل من حَكِّي الغنا..

وان قال يسمّع..

واحتال على الحزن الذكي بأمل مدّمع..

نُصّ الألم، نُصّ الصديق..

حاذِر تكذّب يا رفيق، الصعب أَلْمَع..

الشِّدَّة من نسل الضياء، والحر يسمع..

الشدة بتخلّف ولي، الشدة بتخلّف نبي..

بتخفّ فيطولك براح..

يشبه براح قلب الصبي، والشدة أوسع..

اكتب عن الليل، ينطوي..
أَوْ رَصَّعُهُ بِعُقَدِ الْمَجَازِ..
واظهر لَهُ زِي النخل في حَيْطَانِهِ الْقِرَازِ..
وامشي لَهُ عَارِى لَمْ مَكْمَنَهُ..
والضَّم شقوقك بِاسْمِ شوقك وارتياك في الملاذ..
الريح بتسجد، نَدْر للكتف العفي..
والي افتقد في المِعمعة كتف الصَّفِي..
والي انتبه للسر في بُعد النجاة..
وقت اَمَّا نَحْتَ اليأس صاغ معنى الحياة..
طبّط على تُقَل الأمانى فخطوته..
كان النشاز..

الضيقة غُرْبَةً لَكِنَّهَا مَرَايَةً..
تَجْلِي القلوب العُُمِّي كَالآيَةِ..
الضيقة شِبْر..
لكنها أوطان بحق..

دقق في طينك وافتكرك..

وقت امّا كان عضمك ورق..

الضيقة سكرة بتبتدي..

خَلَقَ البصيرة من عَلَقَ..

المسيح

الصوف حرير صابُه الوجع..
والخوف ضرير والموت جدع..
والعتمه ضي، والضي دين..
يا أيها المستبسِلين المهتدين
القابعين في الميمنة..
منكم أنا..
يا مقسمين الدم ع الجبهة..
يا محنّين أطرافها بجباهكم..
يا عثمانيين في الضي حاف..
يا زاهدي دَرَب البِدع..
كفّي الي طاف يهدي الكفوف سُبل السلام..

لم ينصفهُ كف الوداع..
المسيح الحي قال
قبل رفعه للسما والحواريين جلوس..

اعلموا هذا النبأ..
ما أنا إلا رسول..
إنني عبدُ الإله..
ابن هاتِكُم البتُّول..
إنَّ ربي لم يلد..
أولَّ فردَّ صَمَد..
لا يكونُ ولم يكن..
لُه في زُمرَة خلقه صاحب، أو مُكافئ، أو سند..
يا دُعاةَ المائدة:
إنَّ منكم كافرين..
بالنبأ بعد الإيمان..
وان فيكم حد خان..
راح يبيع دمي بـ رخيص..
إنني ذاهب لربي..
مش هموت ولا هتصلب..
إنَّ لي في الناس لعودة..
لجل نُصرة أهل دين ابن عبد المُطَلِّب..

آل يهوذا لما هَلُّوا..
الحواريين تَخَلُّوا..
لما وقت الصلب حان..
كَمْ هموا ضهرك يا عيسى..
مين بقى إلا القليل؟

المكان في بيْت لحم..
والزمن غير الزمن..
قبل ألفين مِ السنين..
السما بتنعي الحقيقة..
والحفاة الثابتين..
المسيح هيموت شَبِيهه..
والجميع هيقولوا مات..
والدليل هيموت قتيل..
مش هيفضل غير رُفات..
الولاء التام هيصبح، للكتايب والشَّيع..
كُل حزبٍ تاه في سكة..

كل صابر غُرَّه صَبْرُهُ..
والي فاضل لك جَزَعُ..

يا مَسِيح الكل خانك..
اوعى تطمع في المدد..
الي فاضل والي ناضل..
تاهوا في زُحام العدد..
العبيد في كل آن، لم يجدوا بدمُهم..
الحواريين يا عيسى:
مش هيوُفوا بوعدهم..

التاريخ فارض صياغته..
ع الأماكن والبشر، كل عهد وكل حين..
التاريخ سَجَّان سَجِين..
ابن آدم دان، مُدان.. والزمن دَيَّان مَدِين..

الأسفار

إذا العيون انكفت على خطوة الحَجَّال...
وإذا البصر مدَّته، تطبق عليه علَّته...
وتلوح حروف رَقْوته من كعبة الدَجَّال...

وإذا المنايا⁽¹⁾ انبرت⁽²⁾.

وإذا النفوس انجلت في ساحة الغربال...
وإذا السدود يا ورود بتسعر الأخدود
وبرغمها الموعود يطوي اللي طال وإن طال..
والخنجر المسموم يسقي القدوم والشوم
يا ضهرك المكلم، يا سجنك المحتال...
وإذا العروش بتبوش، على ضِلَّها المنقوش
تنده ومين هيحوش، طاقة هدى الخيال...

(1) أصناف الموت.

(2) انتصبت واشتدت.

وإذا الحروب بالطوب، تسطر المكتوب...
والإنسانية التُّوب، تتعري مِ المغصوب
وبصوت ضمير مثقوب تتغنى بالموال...
والإنسانية الصَّك، تساوم الي اندك
وعلى النِّيَاب والفَك تغزل سَنَا⁽¹⁾ وسِرِبال⁽²⁾...
والإنسانية الدون، تزخرف المجنون
والوعدة يا مأفون، كَفَك عليك ينهال...
يا دورة المقلاع، يا وَسْع قبضة وباع⁽³⁾
كل العرايا سُبَاع، والمتقين أندال...

شوف الرماد سِجاد، وَاعلام نَوَى⁽⁴⁾
وأوتاد، تهمس في ليل جلاذ:
"أهو شَق موته وعاد، يسقي الوبال بوبال"

(1) ضياء.

(2) درع.

(3) مسافة ما بين ذراعين ممتدتين.

(4) البعد

وانظر لِدَاءِ بَكَاءِ، سيد على الأنواء⁽¹⁾
بتهدده الأشلاء، وبينصفهُ المكيال...
وَأَمَّا استحال المصل، يعمى الكلام الفصل
إلا في صوت النصل
يكوى الهوس والطلبل، ويلجّم القوّال...

"سفر العجب"

قُتِلَ الحديد، ما أكفره!
إزاي يلين زي العجين، طوعًا لسيف المجزرة...
وإزاي يصون زحف المُجون
صُوب الكفوف النيرة...
قالو احتجب بيه العجب
آوى إليه، فأقبره!
قال الحديد: أنا مش حجر...
واما يخون حامي الحمى

(1) جمع نوء، وهو سقوط نجم في المغرب مع طلوع الفجر، يقابله طلوع نجم آخر من المشرق.

تبقى الدِّما وجهة نظر...
واما يطال طوق الضباع، جِدِّ العزيز القَسْوَرة⁽¹⁾...
تبقى النجاة لابن الحياة
خط البارود للمقبرة...

"سفر الخلود"

يا دولة فوق الريح...
كل الي فات أنات
والجاي حِمِّم تباريح⁽²⁾...
حتمًا يفور تنُّور، يخلق طوفان سَجَّان، يقلع طوفان مأجور
في آخر السلسال...
وتزول عِماد السما، ولا ينحنيش الشال...
إذا العيون انكفِت على خطوة الحَجَّال

(1) الأسد.

(2) الشدائد.

يا سامعي

يا سامعي..
الهم مزَّع أضلُّعي..
الخوف مُرابط في الخطى..
الليل ساقٍ مُهجتني..
والبحرُ هابٌ مداِمعي..
يا سامعي..

يا مَنْ دعاكُمْ نوح..
في ساعةِ العُسرة..
إِنَّا هُنا أُسرى..
مَلَّتْ إيدينا الحِيل..
إِلَّا البُكا والنوح..
قُدس الغلاية اتهدم..
اتهد عِزم القلم..
كفِّي الصُّغَيْرَ شاب..

في غفلة خائنه الدور..
وقع القلم في الأسر..
مات القلم منحور..
الحبر سال ما اتلم..
والحبر زي الدم..
إن سال يصحّي التار..
يا مُنْجِيًا ذا النون..
يا مُمْسِكًا أَملاً..
في صاحبيّ الغار..
قد مالت الأفئدة..
قد زاغت الأبصار..
تارنا العبيد نسيوه..
اغنيننا بالأحرار..
دارت سواقي العَجَز..
تروي الوريد في الإيد..
سيف الوعود اتكسر..
مالت عمّاد الجيد..

قهر الرجال قتّال..
القتل خير م الحرس..
يسلم لسان الجدع..
تبّت أيادي الحرس..

وأعتزلكم

وأعتزُّلُكُم..
وَمَنْ تَرَضُّونَ مِنْ دُونِي..
وَأَدْعُو اللَّهَ..
عَسَى الْعُزْلَةُ..
تَجُودَ بِالزُّهْدِ فَازْهَدْكُمْ..
وَتَزْهِدُنِي دَوَايِرُكُمْ..
وَأَسْلَمَ إِيدِ رَحَايَا..
لِكَفِّ الرِّيحِ..
تَدُورُ وَيَّاه..
يَدُورُ بِيهَا..
وَيَهْدِيهَا لِدَايِرَةِ تُسَاعِنِي، إِلَّا كَمْ..

يَا مَنْ إِذَا جَنَّ الْبَلَاءُ، غَابُوا..
يَا أَيُّهَا الْمُسْتَمْسِكِينَ، بِالْبُعْدِ فِي الْأَزْمَةِ..
الْوَحْدَةِ مَرْكَبَ وَرَق..
وَالرَّاكِبِينَ، شَابُوا..

سفّنتي الماشية بسم الله..

مجرّاكم ومرساكم..

تعب قُبطانها م الوعد بُ قدوم الشط..

وقرر يقلب الدفّة..

يجدّف حيث لا غيبة، ولا وِحدة..

ولا أحباب..

سألت الله غُفراناً لما غبّتم..

ويأبى الله غُفراناً، لمن قد غاب..

يا أيها السائلين..

عن فايذة الزحمة..

الزحمة حضن فشوش..

والباقي منه سُراب..

والطيّين، تابوا..

كل الي جادوا بعمرهم ما عاشوش..

كل الي خدت بيدهُهم، سابوا..

"فلما اعتزُّهُم، زهدهم عناد..
وساب ذكرى واقفة عليهم حِداد..
ودارت رَحايا السنين عكسهم..
فلما اعتزُّهُم، صَبَحَ مِنْهُمْ..
بعيد زِيَّهم..
يَقْرُبُ ويبعد، ويَهْوَى البعاد"..

الخوف

الخوف كرباج من وهم..
أو قوس مفتول مشدود..
لكن مافهوش ولا سهم..
كم ضل خيال مكار..
قُط اِتْدَارَى ورا سِتار..
واحتالت بقعة ضوء..
لاجل اَنَّهُ بيان لك سبع؟
كم ضل وسيع كداب..
رَوَّض خيل الأسباب..
لاجل اَنَّهُ بيان لك حق؟
والضل بيان مجدول..
بِعِظَم من عرض وطول..
وان كنت تصدَّق فيه..
والعين تسندع العين..
وخيوط الشوف تَضِيق..

يتوسع فيك الشَّقَّ..
تفقد نُص المدلول..
والرؤية الحارسة منامك..
خوفك ع الحيط قدامك..
عن بُعد اتوَحَّش جايز..
واتمدد؛ لكن رَقَّ..
وبرغم سواده الباهت..
لَمَّا تقرب يَغْمَقُ..
تهديد للخطو الثاير..
ودواير تسقى دواير..
تَزَعَقُ في الخطو ستاير..
وتخونك كل ظنونك..
وتصونك كلمة لأ..
وتسوقك لأ للآخر..
والخوف يصغر يتأخر..
ينفد من ضلع الشيش..
يهرب من عَقَب الباب..

وتدوب تفاصيله لنقطة..
تذكر من آخر لقطة..
يلبد لك في السرداب..
ويعيش على طيف السمعة..
مسنود على آخر خدعة..
وقدور الأدرينالين..
يا اللي ابضّيت مِ الخوف..
الخوف كان أمّن مين؟

المرسال

يا مجاور كتف الشيش..
والضِّل مرافق سقفاك..
وعينيك أضيق من كادرك..
علشان ما كواها الوسع..
وما عِرْفَتُني الألوان..
أنا طيف جنبك بِ ما فيش..
مرسوم على لوح الزَّان..
متشعبط في الدخان..
الغاوي يَكُرُّ سيجارتك..

أنا خيط من نجم أماره..
صدقته فسبته يعيش..
سبت الحلقة الدَّوَّارة..
والأفلاك والدرأويش..
أنا جيت علشان أدِّي لك..

دمعك ضَوَّى لقنديلك..

فأمنت إنَّ أنا ماعيش..

يا مصدق حضن الشيش..

خايف تفتح للدنيا..

لـ النور ينفد جواك..

وطواط في تابوته الأرضي..

خايف مـ الحرق الوردي..

والحلم الطاير جارك..

أنا عايم بين أفكارك..

فيه لون عرفك وأجارك..

ساقني لزحمة أسوارك..

خاطر باسمه على الرقعة..

يمكن ينصف أحجارك..

ريش المراسيل على كفي..

خايف يلمس أوتارك..

وانا خايف زيّه وأكثر..

وما فيش غير حيرة فُ صفى ..

أزَعَق وأمد الإيد ..

وَاسْقِيكَ من لحن جديد ..

أَوِ اِمدِ الشوم على حَرْفى ..

واخرج عن طاعة سقفى ..

وما امدُّ أمل لِشقوقك ..

يمكن يتبدّل سرُّه ..

يتمدُّ ضباب من فوقك ..

لكنّى خيال مرسال ..

لو فكر لحظة يتوب ..

وما فيش يابن الأهوال ..

عَرَجَة في خطو المكتوب ..

باخذ تراويل الهدنة، وامدح صبر النُّسّاك ..

وباقول والقول مش ملكي ..

ع الشيش مصلوبة المنية ..

تخلق منظورع الدنيا ..

ييهت ع الجاي هناك..
لكنهُ يجوز فيه شيء..
ما اغتالش فُ سكة رفيق..
ساجد للخطوة الصاحية..
مكتوب على كتف الناحية..
التانية من الشباك..

ترانيم

قلبك مدّارين ذهب، عَبَّرَ حَلاها الهجر..
خَطَ الجليد مَلْمَحُهُ، عَتَمَ عَيْنِيهِ الغدر..
قلبك قصايص ورق، تحت المطر في عَيْنِيكَ..
عصفور صرَّخ للدفاء، يكوي الصقيع في الفجر..

وَشَمَّ العتاب بالبُكا، كان مشنقة لُومك..
ساب لك رماد من أَلَمٍ، دُخَانُهُ في هدومك..
هتلوم؟ ومين ينصفك، لو سَفَّهوا همومك؟
صاحبك غراب الندم، بيحوم على حُومك..
أختامُه زي اللغم، في كعب مكتوبك..

يا دِرْع كل دراع..
يا مُلتَقَى الأوجاع..
الضرب فوق جبهتك..
كان كُلُّهُ مِن شُومِكْ..

سلمت للمُشتكى والحيرة والغُصّة؟
رُحماك يا خط القلم، إيه آخرة القصة؟
الرقصة دمع وألم، الحزن له رقصة..
سامع صريخ النغم؟ يا لوعة الصرخة
أنا عيني رَقوة نبي، الرؤيا ليه ناقصة؟
أنا حزني من داغي
أنا حَرْفي من داغي
ارحم قليل صاغي، يا متمنّ الفرصة..

الغُصّة رقصك للحياة لاجل الرغبة..
والحيرة كونك زي كيس شالُه الهوا وقت الخريف..
بيحدُّهُ، ما يدري مكتوب لُه السما ولا الرصيف..
خطّيت فِ سَقف المُشتكى:
إمتى الزمن هيكون أليف؟

يمشي السؤال مَشّي الضيا لاجل الكفيف..

يتجسّد الهم المنيف⁽¹⁾..
ويخطّي فوق رُوحِي بُ حفيف⁽²⁾..
والليل بينزل غ الخطاوي يحبي فيها ألف طيف..
ويقول لي: دول ورث الزمن..
وما فيش حدود تكفي التمن..
ولا كونك الي في الودّع كان الغريب..
ولا وقوفك على حرف الزمن، وحدك..
ولا عصف بيعادي وتدّ روحك..
ولا كونك اضعف من طواحين المغيب..

(1) العالي.

(2) صوت حركة أوراق الشجر، أو جناحي الطائر.

قصايص

كل الحروف أنبيا..
أهل الخرس أندال..
قلب العجايز وتد..
مُر السنين غربال..
يا اهل الكلام اغزلوا..
ضهر الكلام حَمَّال..
صُفُّوا الحروف بِ خُشوع..
صدق الكلام مسموع..
زيف الكلام أغلال..
مَا يهَمَّ قيد الإيد..
الخُر حُر الجيد..
مَشِي الجبان بطَّال..
أُقسم بِ نون والقلم..
وَبُ حق هذا القسم..
غاوي الخلود للعدم..

الْخُلْدُ طَالَ مَنْ زَالَ..

الْحَلَمُ لِيَّ اغْتَوَى..

الثَّوْرَةُ مَرْكَبُ هَوَى..

قَوْمٌ شَرَّاعُهُ الْهَوَا، مَا هَاشَ لَا خَالَ وَلَا عَم..

أَشْهَدُ بِدِينِ مَنْ دَنَا وَقْتُ امَّا شَافَ الدَّم..

وَأَفْدِي الْيَاسِيَّ هَابَ الْخَطَرِ مِنْ حَضْرَتِهِ وَاعْتَمَّ..

وَالْيَاسِيَّ فُءَاوَانَ التَّعَبِ آخَرَ صَحَابِهِ وَآمَّ..

وَالْيَاسِيَّ مُنَاهُ أَعْلَاهُ، يَهْتَفُ بِاسْمِ اللَّهِ..

مَدَحَ الزَّمَانَ أَعْيَاهُ، مَا يَتَنِي عَزْمُهُ الدَّمَّ..

أَشْهَدُ بِدِينِ مَنْ دَعَا لِلْإِسْتِوَاءِ فِي الصَّفِّ..

وَالْيَاسِيَّ فُؤَادِي صُحْبَتُهُ غَضَّ الْفُؤَادَ وَالطَّرْفَ..

وَالْيَاسِيَّ إِيْمَانَهُمْ سَخِي، بِيَسَاوِي مِيَّةَ بَأَلْفِ..

وَالْيَاسِيَّ انْتَوَى الْمَعْرَكَةَ لَمَّا اتَّجَّهَ لِلْخَلْفِ..

وَأَشْهَدُ بِدِينِ أَوْلِيَاءِ آمَنُوا بِزَوَالِ الْحَالِ..

سَاقُوا الشَّجْنَ عِ الْخَوْفِ..

هَبَّتْ أُلُوفٌ لِلتَّارِ..

فَكُتُوا الحصار بِ حُصار..

نَقْصُ البرايا اكتمل..

اليأس في المعركة دايب بِ فِعْل الأمل..

والنَّصر مال في الحال عن دايرة المُحتمَل..

خَسِرُوا ف هو اه أتمان..

والدم أطهر تمن..

فَمَّ الزمن مؤتمن، ع الي انحكى وإتقال..

وان خاف يقول الزمن..

قلبي أنا قَوَّال..

ألفين صلاة ع الولي..

زين الرجال النبي، الفارس الخيَّال..

وَالصَّحْبُ أهل الكرم..

والمؤمنين بِ الوفا، والكُفْر بِ الدجَّال..

إسمي..

"قتيل العمى"

أحمد إله السما، جابر ومش مجبور..

أهلي القلم، والندم، والشَّدة، والمَوَّال..

إِنِّي عَلِيمٌ بِالْوَجَعِ ..
زادني الي ما ينتهي، ما يشتريه المال..
طير الهوى ملّني، ميّل عليّاً وقال:
"قلبك ما لهش جناح، لكنّه طير جامح، له في الهوى أهوال..
قلبك تعب يا جدع، مِ الحِلِّ والترحال.." ..

قُلْتُ: الهوى غلاب..
والسبع فيه مهزوم..
يا طير عزول: الهوى كُـلّ الي فيه محروم..
مَنْ يَرضيه الهوى، لم يَرضيه النوم..
يصبح عليل البال..
العشق زادّه "الصوم"..
وانا ليّاً فيه عامين..
وباقول: يا دُوب كم يوم..
وان صاروا فيه أعوام، هحسبها بالأيام..
أو حتى ما احسبهاش..
مين يتنبه للزمن، لو طال بُساط الريح؟

حُكْمُ الهوى مقسوم..

يا طير عزول: اللوم..

ما ينصف المُغتال..

يَا أُمَّ الْمَرَايا السود..

يَا أُمَّ الخدود بِـ ورود..

فاضت ونزلت مطر، غطّى حَواري الشال..

يا طيف عفيف الخُطى..

مد الخُطى للخُطى، رُد الوصال بِـ وصال..

يا طيف غواه السفر..

لم يشتهيه السهر..

لَمَّا دعاه الهدى..

بدّد إيمانه وكفر..

جبل الوصال معقود..

بتحليّ ليه العُقد..

مَلَيْت أقول لِكَ مدد..

واتعقد المنوال..

إِنْ عَزَّ كَفَّ الْقَمَرُ..
كَفِّي أَنَا مَيَّالٌ..
يَا صَبِرْ إِلَيْهِ الْبَدَلُ؟
كُلَّ الْجُرُوحِ فِي الرُّوحِ..
وَلَا جَرْحَ فِيهَا أُنْدَمِلُ..
يَا صَبِرْ حَبَّةَ خُجَلٍ..
دِلَّ الْعَمَلِ عَ الْعَمَلِ..
يَا ضَارِبِي الْأَمْثَالِ..
مَحْسُوبِكُوا أَجْدَعُ مِثْلُ..
الصَّبْرِ مِثْلُ أَيُّوبَ..
الصَّبْرِ صَبْرُ الْجَمَلِ..
وَأَنَا صَبْرِي صَبْرُ جَمَالِ..

التكنولوجيا

في الصورة كلمة بُ شال وعِمَّة ووش نور..
الدنيا بتبدل ورق..
والتكنولوجيا بتمضي ع الإحساس حضور..

بين العِصَام، جوا النفوس..
وسط الحُطَى، وفوق الورق..
في ركن هادي بدون قلق..
فيه جزء آلي بيتخلق..
ييمدُّ كفَّ الضَلَمَة فوق جِفنِ الشعور..
الشاشة أصدق ولا أسوار المكان..
ولَّا دي دايرة براح مفتولة من دخان..
موجود ومش موجود..
- كل البراح كداب.
هتبان وحيد دايمًا بلا أسباب..
تَبَّتْ حيطان الزخم يا زهرة اللبلاب..

في التكنولوجيا الماضي متعلق على المراتب ..
مش بس في السرايب ..
هنا كل شيء له شيء، من جلدُه بس غريب ..
هنا كون جليدي اللون ..
هنا كل زاد مقسوم ..
بالأبيض المعصوم ..
والأزرق البارد ..
وهنا الحصار نقطة ف مدار ..
تشرح وجودك باختصار ..

نقدر هنا نزعق إن احنا ما بنغلطش ..
وان القدر ألوان ..
وما فيش حظوظ غير لَطَش ..
وان الي ساكن هنا لعبت برُوحه الحرب ..
وان الغوامق طغت في النفس قبل الدرب ..
وان الي مات احتفل، سِرًّا بفك الكرب ..

الدمع أندى ولَّا حَبَّاتِ العرق..
مين زي صاحبه..ومين..
طوق النجاة ومين الغرق؟
طلَّ الشَّبه في الملح والسائل..
طل الشبه خلاني أتسائل..
مين اللي يستاهل يشوف حُسن ف جدائل خطوة بكر..
وكتير معاني وتاج أغاني النصر والتعزيز..
دُنْيا على سَطوح الشاشات أو دنيا حية ع الورق؟
إزاي أصدق في الحاجات وانا قسمتي منها الرmq؟
وازاي أشوف الدنيا..
من فوق السحاب؟
ولَّا بعين المنسي في الدهليز؟
هنا صورة طالَّة من المراية
تقول حكاوي الناس في شكل وجيز..
هنا دنيا زي الدنيا لكن طالَّة مِ البراويز..

اللغز

الوضع مثير

اللغز اتفك

أصبحت سفير

لبلاد العك

مسافات بتضييق

وابواب أحلام

بالخوف تتسك

بندول بالطول

حركات بالعرض

الخوف منابات

بين سُنة وفرض

الحل غريب

صندوق مقفول

مفتاحه مفك

الحسبة خلاص

خَلَصْتُ بِـ "مَافِيش"

أُخْرَسَ بِيَعِيش

يَحْلُمُ بِـ اللَّكِّ

الرَّوْيَةُ طُشَاشْ

وَالزَّيْفُ أَلْوَانْ

فَرَضَ الْبَرْهَانْ

إِنْ أَنْتَ يَقِينْ..

يَحْتَمِلُ الشَّكْ

في ظلال 25 يناير 2011

أطلال في قلوب المساكين
من ريحة خمسة وعشرين

س، ص

المشهد "س" ..

والمُدْخَل "ص" ..

والحبر الواقف بالمِرصاد ..

لحروف النَّص ..

أوراق .. أشلاء ..

أشباه أبطال ..

والقصة وبس ..

الحبكة ما فيش ..

والكاذر ظلام ..

خَيْمٌ على نور ..

هربان م الشيش ..

الدور مبتور ..

ناقصُه نهاية ..

أو جايِز ناقصُه يكون الدرس ..

أوقات اللغز يكون حِكْمَة ..

وأوقات بنكْمَلْ نقص بـ نقص..
لُفَّيت في بلاد الله سايح..
مديت الإيد..
أوطان لله..
درويش معايش..
والقوت فكَّة..
ومنين بالفكَّة تلاقي حياة..

"جرانين .. جرانين"..
بيَّاع سَرَّيح..
يشبه قلبي..
قَوَّال وصريح..
أخباره بتشبه للدنيا..
بتدور ع الناس..
وبيشبه دايماً للساقية..
بيدور للخلق..
أخبار .. أهرام..

اقرا الحادثة..

مانشت على الصفحة الأولى..

الزيف ييدمّع لاجل الحق..

واهو لابس واعظ واهو واقف

على قبره يقول..

أهو مات مقتول..

علشان اتجرأ ينطق لأ..

ابنوا لنا صوان..

ويا شيخ علان..

اقرنا على الميت فضلاً..

تراتيل الصمت..

يا بلاد يا بلاد..

يا بلاد أنا بهتف حرية..

ولبست لجام..

وفقدت الدين..

وفقدت الروح..

محبوس في الماضي ما فيش قُدَّام..
فَرَسْمَتِكَ سَجَن..
وَكْتَبَتِكَ شِعْرَ اصْفَرَّ بَاهِت..
فِي قَصِيدَةِ حَرَام..
وَحْتَمْتَ قَصِيدَتِي بِدَمٍ وَخَوْف..
وَإِكْمَنِّي بِشَوْف..
كِرْهُونِي الْعُمِّي..
وَقَالُوا لِي بِلَاشْ تَطْيِيشْ يَا كَفِيف..
هَات لَكَ عُكَّاز..
وَالزَّمْ حَيْطَتَكَ..
خَلِّيك فِي الرِّكْب..
وَإِيَّاكَ وَالسَّبَب..
إِنْ طَالَ السَّيْر..
الَّذِينَ مَطْلُوب..
يَا تَعِيشْ مَيَّال..
يَا تَمُوتُ مَصْلُوب..

النور على صدق الشُّوف برهان..
والعمى ألوان..
وحارتكم سدّ..
أنا شايف بس الشُّوف ع القد..
وان كنت انا عن دينكم أعمى..
فَالْعَمَى مرغوب..
والْعَمَى نعمة..

وَجَّهْتَ وجهي للذي..
سَوَّى السما من غير عمّاد..
تَسِنْد على كتاف العباد..
تعشق هلال ع المأذنة رغم البعاد..
ساعة العصاري الملهمة..
تنزع حجابها تبان عيونها الفاتنة
والمُعلنة عن حُبِّها الفَوّاح..
صوت الأذان مرتاح..
سِحْر الأذان مَوّال..

في عشق سجادة صلاة..

دابت خيوطها من السجود..

العشق جُود..

العشق زاد وقت السفر..

في عيون آخرها ما انكتبش..

وعيون بلادي ليه متاهة ضيقة؟

والضلمة أصل ف كادرها؟

النور جنين..

بشرها بيه وحي الإله..

رغم انها كانت عقيم في سن يأس..

رايد إلهك يصطفئها ويمتحنها بمعجزة..

والإرادة ف حق من خلق الإرادة نافذة..

والموانع إن تصادفها ف طريقها تعين..

في حضرة الأنبياء..

كانت أمور الوحي متسخر لها جبريل..

وكيف ما يكون..

في مرّة الوحي يبقى دليل..
ومرّة الوحي يبقى كتاب..
وكل كتاب يحوز تراويل..
تصون المهتدين بِ خُطَاها لا يُضِلُّوا..
ولكن شاء إله الكون يكون وحي العجوز.. إلهام..
ويبقى الوحي في آية..
تصيغ المستحيل.. إمكاني..
كان نَصَّها:

"وقت المخاض، هُزِّي إليك بجذع عزم، وجذوع نضال، ساوي
الكتاف، تنزل عليك سنين رُطب، وتزول عجاف"

الوقت دار..
والحمل تم..
هَلّ الوليد من بعد دم..
لكن إلهك له حِكم..
النور ضعيف..
والأم عكس الأمّهات..
جاحدة النعم..

وعشان ميزان الرَّب عدل..

يبقى الجزا زى العمل..

وتنول نصيبها من الجحود..

ويموت في مهدهُ ابنها..

وتموت رسالة كان في يوم مكتوب لها..

تعدل مسار اللي اتقلب..

أمرك غريب يا دي البلد..

أمري عجب..

مخبول.. غبي..

تسقينني مَرَّ..

وارجع واقول أنه الشِّفا..

أنا جُدت فيك بِ كُلِّ شيء..

لكن يجوز..

ما جُدت فيك بالكفِّا..

لَسَّا الأدان رافض يموت..

لَسَّا الحناجر ملوها طاقة صُراخ رغم السكوت..

لَسَّا العنَادِ مِلُّوْ الولَادِ..
إِنْ شَافُوا إِيَّهْ.. مَا بِيرْ جَعُوشْ..
وَانْ خَافْ زَمَانَهُمْ.. مَا يَخَافُوشْ..
وَإِنَّا زِيَّيْهُمْ..
مَا تَهْمِينِشْ المَقْصَلَةَ..
يَا بِلَادِ بَتَسْجِدْ لِلْعُرُوشِ..
أَنَا جِبْهَتِي مَشْ لِلصَّلَاةِ..

الوصايا

إن تنغمس في فلسفة الحياة، تجدها "ثورة"؛ فإما ثورة على النفس، أو ثورة على واقعها، حتى وإن بدت الحياة هادئة، فما الهدوء إلا ما يسبقُ العاصفة، والحياةُ العاصفة، الحياةُ الثورة..

"تقديم"

الأعمى حاكم والوطن بَصَّاص..
طبَّطْبَتْهُ سِجَنٌ، وَخُضْنُهُ مَلُو رُصَاص..
جُدْرَانُهُ تَشْبِهُ مُخْبِرِينَ اللَّيْلِ..
البحر والخوف والقمر حُرَّاس..

الحرب شَبَّتْ، والعدا مناكيد..
والصُّحْبَةُ شَحَّتْ، والعَتَادُ الْإِيد..
وَعَتَادُ عِدَاكُمْ أَغْيَا وسلاح..
السُّلْطَةُ سُونَكِي فَضْهَرُ كُلِّ عَنِيد..
أَعْتَى الخسائر مش دِمَا وأرواح..
نُصُّ المَعَارِكِ لَمْ يَكُنْ فِي السَّاح..
نُصُّ المَعَارِكِ شَبَّ فِي الفِكْرَةِ..
وَكَايْنَهَا أَرْضَ وَسَمًا وَبُكْرَةَ..
وَكَايْنَهَا مُهْرَةَ وَغَضَبَكُمْ سِيد..
وعشان كذا باقيين لهذا الوقت..

بِنَقْلِ سَاعَةٍ وَسَاعَةٍ تَانِيَةٍ نَزِيدُ..
مِنَّا إِلَيَّ يَثْبُتُ أَوْ يَزُوجُ وَيُحِيدُ..
حَقَّ إِلَيَّ سَلَامٌ بِالدِّمَا الرَايَةِ..
غُرَّةٌ فُ قُلُوبِكُمْ تَلْتَمِعُ وَتَقِيدُ..
ثُورَتُكُوا خَطَّتْ فِي التَّارِيخِ آيَةً..
تَدْنُ بِثُورَةٍ فُ قَلْبَ كُلِّ وَلِيدُ..

الوصية (أ)

عَرِبِل رِفَاقَكَ، صَفُّكُمْ يَزْدَادُ..

النَّصْرُ حُرٌّ مَا يَغْتَوِي بِأَعْدَادُ..

رَدَدَ نَشِيدَ الْمَعْرَكَةِ فَكَفَّ..

وَاسِدِلَ حِدَادِ الْكَهَنَةِ وَالْأَسْيَادِ..

تَمَّ عَلَى الشُّجْعَانِ إِذَا غَابُوا..

وَإَوْهَبَ دِمَاكَ لِلْسَكَّةِ دِيَّةً وَزَادُ..

جَوًّا الْمِيدَانَ وَسَطَّيْكَوَا هُودَ وَيَهُودَ..

الْخَائِنِينَ أَعْمَى وَالْجَدْعَ قَنْدِيلَ..

حَازُوا الْمَنَاقِبَ وَإِنْ جَرَفَكُوا السَّيْلَ..

الَّذِي انْقَتَلَ مَا جَرِيشَ يَلُمُ الدَّيْلَ..

كُلَّ الْعَسَاكِرِ خُوفَهَا بَانَ الْخَيْلَ..

أَمَتْنِ حُصُونَهُمْ مَبْنِي مِنْ خَوْفِكَ..

دِينَ الشُّجَاعَةِ مَا ارْتَضَّاشَ أَوْغَادَ..

الَّيْلَ مَا هَوَّشَ لِلْهُدْنَةِ لَوْ تَعْلَمَ..

الليل خطاوي الغدر في اليشمك..
غَنِّي إذا دمعتك مَرَّت على خدك..
واندَه عليها أنا البلاد يا بلاد..
فرعون يهاب الضِّي لا تهابوا..
فرعونكوا قُط استقوى بالأوتاد..

البندقية عاهرة وطاهرة..
تخضع لِحُر، تُخونهُ فمظاهرة..
تهديه رُصاص، أو تهدي راية نَصْر..
منها وبيها الفرّة والكُرّة..
يسقط بِقُولها، ويسنّده الأسفلت..
وكأنّه حاضن في الضلوع زهرة..

الوصية (ب)

ضَمِّدْ جِرَاحَكَ، لَوْ رِفَاقَكَ شَاشَ..
وَانْعَيْ إِلَيَّ ثَبَّتْكُمْ، وَمَا اسْتَنَاشَ..
اجْعَلْ دَوَامَ الْحُضْرَةِ مِنْ ذِكْرِهِ..
وَإِنْدَهُ يَا صُحْبَةَ فَلَانٍ سَبَقُوا وَعَاشَ..
زَوِّدْ لِحُجُوعِكَ أَلْفَ جُوعٍ، مَشْ جُوعَ..
وَاشْبَعْ فِي سِيرَتِهِ تَلْقَى جُوعَكَ بَاشَ..
شَهِّدْ إِيْدِيكَ عَ الْحَيْطِ بِاسْمِهِ وَضَيْفَ..
سِيرَتِهِ عَلَى جَبِينِ السَّمَاءِ مُنْقَاشَ..
قَدِّمْ لِي حَتْفَكَ لَوْ نَوَيْتَ تَرْكَعَ..
مُوتَكَ شَفِيعَكَ "مَاتَ مَا بَاعَشَ بِلَاشَ"..

"نُص القصيدة وَمَتْنَهَا"

ضُمَّ القَدَمَ عِ القَدَمَ، تِلْقَى المَكَانَ سَاعَكَ..
وَانْسِجْ خِيوطَ العَدَمِ مَتَوًى لِأَوْجَاعِكَ..
اعْزِفْ أُنِينَ عِ الوَتَرِ، وَاسْقِيهِ لِأَسْمَاعِكَ..
طُوبَ المِيدَانِ الجَدَعِ، وَخُصَانُهُ مِقْلَاعَكَ..
مَا تُخَوِّنُوشَ، صَدَقُّهُ، وَيَسْنَدُهُ دِرَاعَكَ..
اسْمَعْ زَئِيرَ الهَوَا، الكُونِ بَقَى بِتَاعَكَ..
مَسْتَنِي مِنْكَ قَسَمَ، أَوْ شَارَةَ بِصِبَاعَكَ..
مِنْ بَعْدِ هَذَا الكُونِ، نُقْصَانُهُ هِيْضُوكَ..
يَسْلَمُ نَصِيرَ خَطُوتِكَ، مَلْعُونِ يَا مَنْ بَاعَكَ..

"قَتْمَةٌ"

طَبَّ الْوَلَدُ، وَالْدمْعَتَيْنِ عِ الْخَدَّ..
قَالَ اوعُوا دَمِّي مَا يَلَا قِيشَ لَهُ حَدَّ..
ثُمَّ ارْتَعَشَ، ثُمَّ ابْتَسَمَ وَاتَسَدَّ..
نَوَّرَ جَبِينَهُ، وَالنَّهَارَ اسْوَدَّ..
صَرَخَ الْيَمَامُ كَانَ صَوْتُ زَعِيقِ الْكُونِ:
"يَا أَهْلَ السَّمَاءِ، غَيِّتُوا إِلَيَّ مَاتَ عِ الْأَرْضِ" ..

الفيلم

مقدمة

عالم.. سخيـف..
عالم.. جُبَاة البنكنوت..
عالم.. دعاة الانفتاح
والفوضوية الماـجئة..
عالم براـح..
واوقات يضيق وقت اللزوم..
المصلحة حاكم مُطاع..
والمجد لـي يصبها فـ كاسـه..
تاج الملك مسحور..
دائماً يسيب علامات..
على كل من قاسـه..
الظلم دايرة ع الغلاـبة مقفلة..
اللـقمة حلم المطحونين..
الحق.. مشـهد مسـرحي محبوك..
تملّي يمثـلوه ملاعين..

الجملة محفوظة..

والدور غريب..

لايق على الكداب..

"باقتدار" ..

قال الممثل جملته:

- "ياهل الحقوق.. الحق سكة ماها إلا الدم باب.. وانا منكم..

أقسم بديني وجمعكم.. أُنِّي سوي.. زاهد قوي..

كافر بدين المَريسة والمألتة ع الخلق..

راجي الثواب.. ومن الإله بس القبول.. وإلى الإله.. يسري المآل".

فجأه انفع..

شد الحضور..

لما ارتجل..

دَمَّع.. بكى..

وبحنكته سد المجال..

أفنع عقولهم بالمحال..

وأما جه وقت الفيئال..

اللي مجدّ والي صقف..
كانوا حُكمًا..سكرانين..
واللي كان بالغصب فايق..
سب ليهم ألف دين..

(1)

في بلاد ما تحت أقدام الملوك..

في عصر ما قبل اشتعال الملحمة..

طفل اتولد..

يظهر ولد..

يظهر مدد ساقه الإله..

مرسال حياة فيه الخلاص..

رغم أنه عام دبح الذكور..

ربك يريد..

والواد يعيش..

كيد العدا يصبح مافيش..

مشهد درامي بيتقلب كارتون..

ها قد نجا من قبضة الفرعون..

(2)

لما استوى ..
عود الصبي ..
كات هيئته ..
تشبه نبي ..
الواد ولي ..
ثابت .. أبي ..
رافض لكل المغريات ..
كان حاجة شاذة عن القانون ..
كان صنف ثاني من البشر ..
كان من دواعي المعجزات ..

(3)

حال الوطن ما يسر..
العيشة خلفاً ذُر..
صوت البشر مكتوم..
طعم الشوارع مُر..
مركب وطن مهتوك..
مركب وطن تايه..
حالف ما يلقي البر..

(4)

تم الولد عشرين..
أوحى إليه موله..
أن نادي في العايشين..
قوموا اخلقوا حياة..
هَبُّوا عبادَ الله..
وانسوا الوَهَنَ والخوف..
اتمردوا ع الحال..
ثوروا على المألوف..
واملوا الميدان بهتاف..
ولتلعنوا أسلاف..
كل الي حاكمينكم..
ولتعلموا..
إن الحياة.. فرصة..
وان الخلود نعمة..
مش من نصيب مَنْ خاف..

(5)

ها قد بدا في الأفق نور..

والملحمة على وشك لحظة الابتداء..

الناس بتنده ع الشروق..

والموت بينده ع العدا..

صوت الضعيف هز السكوت..

صوت العَفِي أصبح صدى..

(6)

2011 / 1 / 25،26،27

أول نهار..
والثاني والثالث..
الحبكة بانت..
والنفوس هانت وأنت فترة مشؤمة..
والغمة طالت واستطالت حتى صارت..
كالغمام الي ما يتبعهوش مطر..
الحلم محفوف بالخطر..
والحر ما استسلمش..
أقسم يمين الحرب..
ما يخافش وقت الضرب..
ناسي الرجوع والجوع..
شاف الفرج في الكرب..
بين الأحبة عمار..

وانا عاشق الأخطار..

ملعونة عيشة العار..

ملعون جبان القلب..

(7)

الحلم صار..

على بُعد خطوة من الزمن..

لكن لا بد من التمن..

علشان تتم الملحمة..

لازم دما..

لازم فدا..

حكم القانون..

علشان تحرر عبد..

لازم يموت أحرار..

(8)

2011 / 1 / 28

رابع نهار..
يوم مختلف..
الصباح نزل حجابہ..
وانكشف وجهه العبوس..
يوم كيوم ما الهادي ظل..
فيه كرم الكون آيات..
كان حرامنا يومها حل..
خوفنا مات..
هل طه..
واختفت في الكون متاهة..
والسنين فرحت خطاها..
والطيور علّت غناها..
والسما بالكف طالت..

أعلى من النجمة فسمها..

وانطفئت نار المجوس..

النفوس.. قادت غضب..

والجموع ما لهاش عدد..

إحنا بصدّد..

مشهد خيالي منطقي..

بيلخصه الآتي..

الكوبري والميدان والقِمّة والشارع..

والفوقه والتوهان..

واللهفة والحرمان..

مع صوت أدان دفيان..

والمادنة والجامع..

وصمود ما بعده صمود..

وقيود بتتكسّر..

وعيون تشوف الموت ويشوفها يتحسّر..

وأئين وغاز ورصاص..

وبشارة مخفية ..
وملايكة زي الطير ..
وملايكة ع الأسفلت ..
وآرواح رايدها الموت من إيده تفلت فلت ..
وملوك تهاب غلبان ..
وعيونها لم تغفل ..
سهرانة لم ترتاح ..
يا جيش من العُزْل ..
خوِّفت جيش بـ سلاح ..

(9)

الواد في وسط الخلق..
عابس وبينة العِزَّة في كتافُه..
يُصرخ يصيح..
يلهب جنود الحق بِهْتافُه..
يملا الميدان صلوات..
يلمع في وشه النور..
وتطل م السماوات..
تنده له ست الحور..
فيلبِّي زي الريح..
وتودَّعه الأنفاس..
ويصيبُه داء الموت..
على إيد جبان بالطلق..

(10)

الوقت.. غروب..
والشمس خلاص..
بتلملم نورها عشان ترحل..
والبرد بيدن في الشارع..
والناس ما مشتش..
الشمس الصافية المغصوبة..
بتصلي عشائهم وتدمع..
وتنادي المولى يجود بالنصر..
تترجى المولى عشان تفضل وسط الميادين..
وتقول لو اطول..
أنا كنت أنور لياليكم..
وافدي اللي فميادينكم واقف وافدي الجايين..
أنا كنت أطوف..
وأبوس أياديكم واهديكم..
سماوات ألوان..

وأعلّق أمانيكوا الطاهرة على صدري نيشان..

أمانيكوا الي اتقلبت آية..

أقسم ليكون ليكوا حكاية..

تتعجب منها آيات الكون..

أقسم لو اطول..

أنا كنت أحارب وياكم..

وافديكوا بدال الروح بِألوف..

(11)

2011 / 2 / 11

نايم في حضن النيل..
بدراعهُ متدقيّ..
سامع غنا ومواويل..
صحيت في بالي حاجات..
الحلم والتأويل..
الست والمنديل..
والنظرة والمدلول..
وإيدين لينت بُتُول..
خجلانة من كَفَى..
وعيونها والبسمات..
والحيرة والأثأت..
وكلام ب طرف العين..
سارح ف وسط سكات..

دايب ماهوش مفهوم..
جايز تكون عاشقة..
جايز أكون موهوم..
يا ساكنة في الأوقات..
عينك شهود إثبات..
ولّاها دي بتنفي؟
ست البنات يا سلام..
زيّك يا مصر تمام..
تضحك تبل الريق..
تحزن يبور القلب..
واهو آن أوان ضحكك..
واهي دارت الأيام..
ع الخاين ابن الكلب..
يا مصر فات الصعب..
واتفضل الأصعب..
درب البناية طويل..
لكن يا محلى الدرب..

يا كل مصري بعيد..
يا كل متغرَّب..
ارجع كفاية بُعاد..
وحياتها لتقرَّب..
الفرقة سارقة سنين..
والوحشة طمّاعة..
والدنيا بالحسابات..
تطلع يا دوب ساعة..

يا شعب يا منصور..
اسمع تمام القُول..
العبرة بالنهايات..
فلتَحذر المجهول..
شق الصفوف هيصيب..
فيكم مكان الشرخ..
لَمَّا الأيادي تسيب..
تَشْبُكها إيد الفخ..

الثورة مش آخر..
لكن سلام تعظيم..
الثورة لو سورة..
غضبك يا دوب حَامِيم..

صوت تشويش

سيداتي سادتي..
عذرًا على التشويش..
الفيلم ما كملشي..
إنَّ البطل قد غاب..
سافر بدون أسباب..
لبلاده في الماضي..
رد الزمن للخلف..
مرّة ويمكن ألف..
عجبي على الي قام..
بالثورة ع الفاضي..

خاتمة

الفيلم لاجل العلم..
هيجي لهُ يوم.. يكمل..
والغايب الحاضر..
لازم في يوم هيعود..
لَسَّالنا يوم موعود..
غايب ولَسَّالما جاش..
لَسَّالنا يوم محتوم..
ينفع عشان يتعاش..

لَسَّالني ليك سراج وضيّ..
لَسَّالني صادق في الحلف..
لَسَّالْ ليهِ رمز اعوجاج..
لَسَّالني ليهِ زي الألف؟

ختم

المعنى

أنا بين معاني الناس راهب
أضوي الشموع بس ما أفسرش
أسقي الخطب حبري الأحمر
يخلق لهم نار ما بتشافش
لكن لها خط محني
فوق الجبين أو في النني
زي الشهاب ما يخط سماه
وما يلمحوش إلا الغاوي
والعهدة مش ذنب الراوي
العهدة ع الي غواه معناه
وحفر له في جراب الحاوي
وبدر عليه م الروح أشلاء
وقراله في الليل تعويذة
ودعاه بالصَّلب الخالد
وزَعَق عليه وسط الشُّعرا
الفحل منهم والحاوي

أنا والقلم سر مخاوي
أنا والقلم ما احناش بُرَاء
بنفصل الصرخة غناوي
ننصت لها لاجل المتعة
نحكي السُنن في ولاد تسعة
في مسرح اخطاءنا السبعة
وبنسقي كل خطيئة بلون
علشان ما تتقلش الحسبة
ونجمل الحلم برُقعة
علشان نصدق ونكفي

أنا والبشر سطر مقفي
والمعنى شارد زي غزال
أنده له يسرح فوق كفي
فيسوق لي سر فتنهيدة
وقبل أمّا يسكن في قصيدة
أسأل عليه: يرضى يضحى؟

ويَقْصِّرُ المَدَّ فَ جرحي؟

وان يلقى أحمالي ليالي

يصاحبني فيها على القسمة؟

يا معنى مغوار في الكلمة

أنا دمي ليك دية وُسْمعة

مين فينا تلزم له الرِفعة

أنا ولا معنى يساع دُنْيا؟

الشُّعرا أَقلام مبرية

يُقْصِفُها خوف الخوف مِ القصف

موازينهم النفس الحية

إن لم تسلَّم وقت العَصْف

المعنى سارح في إيديا

وانا كل يوم بتدارى ف وصف

المعنى نَسَّاب ينسبنا

أنساب تطول فوق محاسيبنا

يا بشر ما فيش شيء يغلبنا
إلا ان نكون أرقام في الصف

المحسنين هم أفكاري
ساقوا الغزالة ف مشواري
وأنا غزالتي عجوز واعي
يرمي الفتيلة ف أوجاعي
تتأجج النار وتضوئ
في الليل تهاجم أوكاري
يتولد المعنى ف جوفي
يصبح طوفان يكوي حروفي
والحرف يكوي وما يداوي

أنا جيت أواسي الناس جرّحت
كان صابني موت، أنا ليه فتحت؟
ما قصدتش الشوف، بس لمحت
وبلمحي ضوئ لقلوبهم

علشان تكون ليهم قناديل
والحرق طالها بدال الضيِّ
وما فيش لضيِّ ف حَرَق سبيل
كان ودِّي أملك حل بديل
لكن قدر سبَّاق يا جبين
فتَّحت لاجل ما اسدَّ الدِّين
وانا دَينِي كتره أعذارِي
المعنى خيلي ومضمارِي
الحرف أتقل أوزارِي

فهرس

7.....	الشَّك
10.....	1994
14.....	كم سكة
18.....	الشَّدة
21.....	المسيح
25.....	الأسفار
29.....	يا سامعي
32.....	وأعتزلكم
35.....	الخوف
38.....	المرسال
42.....	ترانيم
45.....	قصايص
51.....	التكنولوجيا
54.....	اللغز
58.....	س، ص
67.....	الوصايا
75.....	الفيلم
100.....	المعنى

